

Su borchí a wordo devela door di Prome Minister Eman y Minister de Meza **Pos Chikito Complex, awe un joya pa biba aden**

ORANJESTAD - Otro proyecto pa Pos Chikito parcialmente a wordo entrega na Gobierno diabierna ultimo den presencia di invitado y habitantenan.

Renobacion di Pos Chikito complex ta forma parti di e plan di renobacion di barionan di Aruba cu a cuminsa caba na Yuwana Morto Complex y cual a resulta den un cambio grandi den calidad di bida pa e habitantenan.

Diabierna Prome Minister Mike Eman, su colega di Finanzas, Mike de Meza, Presidente interino di Parlamento Chris Dammers y Parlamentarionan Desiree Croes y Clarisca Velasquez, tabata presente na e ceremonia na Pos Chikito unda cu e prome serie di renobacion di casnan di e compleho a keda cla y entrega na FCCA. "E ta birando un joya pa biba aden," ta algun di e comentarionan cu por a scucha e atardi aki.

Un dia prome Premier Eman tabata di bishita den bario di Pos Chikito cu un accion di limpieza hunto cu funcionarionan di SERLIMAR y GKMB. A informa nan na e momento ey di e proyecto aki cu su prome fase ta cla pa su inauguracion pero tambe a probecha pa staciona diabierna atardi e bus di salud unda habitantenan por a haya un control di nan salud.

Premier Eman den su discurso a papia di e plannan di su Gobierno di cual un gran parti ta pa mehora e poder di compra di e ciudadanonan y alabes crea un miho calidad di bida, manera cu ta tumando luga den barionan cu mas iluminacion, camindanan asfalta, areanan di recreacion pa chikito y grandi. E tres complexnan existente ta na Yuwana Morto (52), Jara (43) y Pos



Momento cu a devela e borchí cu ta indica e proyecto di Pos Chikito Complex door di Minister di Finanzas, Mike de Meza y Minister Presidente, Mike Eman.

Chikito (56).

Na mesun momento e Prome Mandatario a ilustra loke su gobierno a bin ta haciendo den bario di Pos Chikito. A drecha veld di Universal cu tabata den un deterioro total, e bini cu incentivanan cu a logra cende e luznan atrobe y a construi un looppad rond di e veld cu ta permiti e habitantenan haci ehercicio sin ningun peligro.

Pa e proyectonan cu Gobierno ta ehecutando, Prome Minister tabatin masha palabra di gradicimento pa su colega Mike de Meza, kende ta esun di cu ta haci tur e ehercicionan financiero pa logra haya placa pa e proyectonan social aki.

E titular di Finanzas den su discurs-

so a bisa, despues di mira e proyectonan di bario na Yuwana Morto, de Vuyst, Village, Yara y Pos Chikito, cu e ta masha contento y a invita ehecutivonan di FCCA pa sinta na mesa pa mira con e institucion aki por haya mas placa pa realisa mas di e tipo di proyectonan aki, na un interes mas faborabel.

Pero ta den tur skina di Aruba, Gabinete Mike Eman ta hiba e renobacion di structuranan y duna un miho calidad di bida.

E ceremonia oficial a finalisa cu develo di borchí di e proyecto, door di Prome Minister Eman y Minister di Finanzas Mike de Meza, kendenan a keda basta largo pa combersa y celebra cu e habitantenan. □